

Äsch anstatt Mehl

Die Begebenheit soll sich mol wirklich vor villi Johre in eem Banater Hecke-Dorf zugetraa han. Es Leni war die Obeda-Tante. Es war e junges, recht hibsches Freilein un alli Buwe ausm Dorf han sich noh dem Leni umgschaut, villi hätte gheere e Liebschaft mitm anfang. Doch des Mädli hat se alli abgewimmelt, hat sich teerisch un blinn gstellt, wann e eventueller Hoffierer anfang hat, em liewi Aue zu mache.

De Pheder un es Lissi ware verheirat, ihre zwaa Kiner sin schun in die Obeda gang. Die Obeda war in eem große Gebeide im Mitte Dorf un newedran war die Ferma-Kantin. Dorte is for die Tachlenner, die wu aus alli Landesteeler kumm sin, for sich in dere Ferma ihre Brot verdiene, gekocht gin. Selmols war jo die Mehrheit der Dorfbewohner Schwoweleit, so ach die Fermakechin. Wann se for die Fermaleit Hebkuche gebackt hat, hat se immer meh Taich geknet un ach for die Obeda-Kiner Kiechle gebackt, natierlich zur Freed vun de Kiner. Doch so ganz ohne is des nit abgang. Die Eltre vun de Kiner han reihum e Kilo Mehl in der Obeda abgin, dass halt alles sei Ordnung han soll.

Immer hat dann der Pheder iwers Lissi gsaat: „Richt e Stanitzl voll Mehl, ich han sowieso im Dorf zu tun un wer des beim Leni abgin!“ E anres Mol: „Lissi, mir sin wieder an der Reih for Mehl in die Obeda traan. Du hascht genuch mit der Wertschaft un de Kiner zu tun. Richt mers nor, ich wer des erlediche!“ Wie des phaarmol so gang is, ufmol is es Lissi misstrauisch gin. Es war eifersichtich uf des Leni un hat sich halt de Kopp derdriwert verbroch, was der Pheder dann immer wieder druf bsteht, des Mehl zur Obeda-Tante zu traan.

Wies mol wieder soweit war, dass de Pheder e Stanitzl Mehl abgin hat wille, hats Lissi des Stanitzl mit Äsch anfillt. De Pheder is dermit weggang, es war awer es letshti Mol, dass er Mehl hat wille selwer abgin. Un ab sofort war Ruh im Haus. Es Leni un es Lissi ware zwar immer freindlich zunaner, doch e Stachel is sitze geblieb.